

**PETRI LOTICHII**  
**SECUNDI**  
**\*ELEGIARUM**  
**LIBER 2. EIUSDEM**  
**VENATOR**

---


Petrus Secundus Lotichius



1069. 32

VII  
LOTICH  
1563






AT.  
PETRI LOTI-  
CHII SECVNDI

ELEGIARVM

LIBER II.



EIVSDEM VENATOR.



LVGDVNI,  
APVD IOAN. TORNAESIVM.

M. D. LIII.





IO. DE SYLVA AD  
LOTHICHIVM.

*Lotichi, si quid cupida sunt omina mentis  
Non opus in tenebris corruct omne tuum.  
Atq; aliquis spectans olim tua carmina, dicet:  
Venator, Vates, miles, amator eras.*

FR. ARTIFEX ATHENSIS.

*Lasciui, molles, teneri, simul atq; salaces,  
Thespiadum procul hinc vos iubet ire chorus.  
Est quibus est cordi Veneris contemnere luxus,  
Atq; pharetrati spicula saeva dei,  
Hos legitote Elegs, miti pietate refertos:  
Casta placent sanctis pectora numinibus.  
Dulce poema, fluens, medioq; Helicone petatum  
Exhibet hic Vates suauiloquente stylo.*



5  
ERHARDVS STIBARVS

ERASMO NEVSTETER

EQVITI FRANCO

S. D.

\*



A E P E soleo mihi ante oculos ponere crebrisq; usurpare sermonibus, Doctissime Erasme, suauē ingenij tui, morumq; sanctimoniam atq; venustatem: quibus tantam tu laudem apud omnes iam es consecutus, vt seculo hoc perdito, & summa rerum omnium perturbatione, multi in spem amplam veniant, excellentem virtutem tuam & industriam Reipublicæ aliquando & bonis literis saluti & ornamento futuram esse. Hæc nos animi virtutisq; tuæ recordatio frequentius, semper tamen mirabiliter afficit, gloriæq; tuæ admiratio ita animo meo hæret infixa, vt ea auelli nunquam possit. Mitto igitur ad te Lotichij nostri Elegos, neq; ita multos vt pertimescas, idq; eò facio libentius, quòd tu non minus optimarum atrium & literarum, quàm & humanitatis & comitatis laude excellis, nec à Poëtarum studijs abhorres, quibus animi & ad virtutem erudiuntur, & ad omnem alacritatem redduntur aptiores. Extabat hic maximus otij nostri fructus in hortis suburbanis, vbi crebrà æstate proxima, quoties se calor fregisset, apricationis causa conueniebamus, Carminum, eorum præcipuè quæ ad ingenij relaxationem

A 2 essent



essent accommodata, pronuntiatio: eramq; ego ibi  
cum Lotichio ad multam diem sæpissimè, & (vt Ca-  
tullus inquit de Licinio)

Scribens versiculos vterque nostrum

Ludebat numero modò hoc modò illo.

Hi nunc in manibus tuis sunt, quibus tu eò etiam fa-  
uebis amplius, quò magis hæc studia reconditis atq;  
abditis è fontibus hauriuntur, & ab imperitorum  
intelligentia sensuq; disiuncta sunt. Quòd si, vt spe-  
ro, feceris, dabo profectò operam, vt amor

noster, qui locorum distantia interruptus

hactenus fuit, apertioribus testimo-

nijs in posterum eluce scat. Va

le. in monte Pessulano

Idibus Februarij,

Anno


M. D. LIII.



# P. LOTICHI

## SECUNDI ELEGIARVM

### LIBER SECUNDVS.



Ad Mathiam Stoium Borussum.

#### ELEGIA I.

*Sume nouum, dixi, vatem cum matre Cupido,  
Vror, & en gressus in tua castra fero.*

*Sic ego, cum tenero sic alma Cupidine mater,  
Militiae princeps tu mihi, coepit, eris.*

*Nec mora, littorea cinxit mea tempora Myrto,  
Et leuiter ridens hac, ait, arma geres.*

*Exoluit promissa Venus: faeliciter arsi,  
Inq; meo nullum crimen amore fuit.*

*Quinetiam voti compos noua carmina feci:  
At citò letitiae nunc mihi finis adest.*

*Et meritò, quid enim frangens mea commoda fugi?  
Vtilius fuerat non habuisse pedes.*

*Nunc & Amor grauius, quia signa reliquimus, vrit,  
Et rapido longas vindicat igne vias.*

*Pollicitisq; fidem iubet addere mater Amoris,  
Concutit & seuas, ne sit inulta, faces.*

*Nonnè fuit melius teneræ seruire puellæ*



Cernere quàm tumidi littus vtrumq; maris?  
 Quid mihi cum pelago, mea si tellure morantur  
 Gaudia? si puppis non vehit vna duos?  
 Cœrula mutandis haud mercibus æquora sulco:  
 Magnificas adeò non ego miror opes:  
 Nec ratibus Zephyros opto, sed amantibus aptos:  
 Quid mihi cum pelago si meus ignis abest?  
 Parce tuo Vati (nam sum tuus) alma Dione,  
 Si Dea scis Votis crimen abesse meis.  
 Sancte puer, pueriq; parens, auertite curas,  
 Digna parens puero, digne parente puer.  
 Vos quoq; Nereides veteres extinguite flammæ,  
 Si quæ viret tecto, quæ iuuet, herba mari.  
 Vos sedate meos ponti quæ sternitis æstus:  
 Credibile est mites æquoris esse Deas.  
 Ipse tenens Citharam (si qua est ea gratia) dicam  
 Tethyos amplexus Oceaniq; senis.  
 Vosq; ministerijs fessos memorabo diurnis  
 Axe sub Hesperio pascere Solis equos.  
 Vana precor, surdum verbis obmurmurat æquor,  
 Hei mihi, quàm longè quod peto littus abest!  
 Torqueor, & cunctas violentius vrer in horas,  
 Arida cœu calidis vritur Alga focis.  
 Fœlix ante alios patrie decus, optime stoi,  
 Et caput erumnis sæpe fidele meis.  
 Tu modò præsentis morbis in collibus herbas

Deligis



Deligis, & succos conficis inde suos.  
 Et modò syluestri meditaris arundine carmen  
 Inter Hamadryadas lassus, & inter aues.  
 Interea gelidis in vallibus aura susurrat,  
 Lenit & ardores spiritus ille tuos.  
 Fœlix qui molles trahis abditus arbore somnos,  
 Irriguæ ducit quos leue murmur aquæ.  
 Me Venus incertis agit imperiosa procellis,  
 Ut rapit instabiles æstus in alta rates.  
 Hinc est, quod dulcis nec carpo dona iuuentæ,  
 Ex humili nec me carmine Musa leuat.  
 Quin prius in numeros faciles quæ spontè fluebant,  
 Vix possunt iustis verba coire modis.  
 Non tamen indignor, merui quoq; fortè, sed angi  
 Mon merui tantis, nec sine fine, malis.  
 Non ego te mea lux, deceptam fraude reliqui:  
 Artibus his mores abstinuere mei.  
 Barbarus hoc ausit, cui non sua munera Phœbus,  
 Nec dedit Aoniam Calliopæa lyram.  
 Dij facite hæc pietas mihi prosit, & ultima passum  
 Deferat in portus me Cytheræa suos.

Ad Dauidem Chytræum.

## ELEGIA II.

Quæ legis, ad ripas Viadri Chytræe Secundus  
 Tristibus hinc Elegis verba ferenda dedi:

A A Pinguis



Pingua qua Ligeris secat arua rapacibus vndis.

Per caua spumosis saxa volutus aquis.

Ecquod erit tempus vestris quo redditus oris,

Aoniꝝ tecum pars Heliconis agam?

Quando erit exhaustos iuuet vt meminisse labores.

Arbitrioq; dies continuare meo?

Hæc ego, cùm reditus agitare[m] mente fovebam

Gaudia, successus non habitura suos.

Nam subito nostris iterum contraria votis

Horrida Menalio bella sub axe tument.

Vtq; ferunt, armis regio vastatur & igni.

Pene mihi patrio gratior ora solo.

Non patria est tantum primos vbi sumpsimus ortus:

Sed quocunq; loco viuere dulce fuit.

O ego quàm vellem, ne quis mihi nuntius esset,

Extremas vltra Solis abire vias.

Degere vel Lybicas vbi dissipat Auster arenas,

Quà non vlla meum fama sequatur iter.

Hoc tamen est leuius, quàm damna videre suorum,

Leniter ad sensus auribus hausta fluunt.

Lumina consclerent alij, qui sanguine gaudent.

Duritiæ non est pectoris illa mei.

Nouimus & gelidas vt tu superaueris Alpes,

Multa forent oculis ne patienda tuis.

Vtq; procellosis toties patet Adria ventis,

Viderit incertum penè salutis, agi.

Quid



Quid loquar ut veteres Arni percurreris vrbes?  
 Quasq; secat Tybris, quas Anienis aquæ?  
 Hinc tua te geminas fortuna remisit ad Arctos  
 Aoniꝝ profers nunc vbi iura chori.  
 Nam tibi (quod lætor) raras in pectora dotes  
 Contulit, & linguam Phœbus utramq; dedit.  
 Oraq; si culto sermone diserta resoluis,  
 Crediderim Musas hoc ego more loqui.  
 O utinam misero solatia dicere posses,  
 Non adeò durum, quo premor, esset onus,  
 Iam neq; me veterum mulcent præcepta virorum,  
 Vlla nec in libris est medicina meis.  
 Sæpe suburbanis (ut nunc quoq;) lentus in hortis  
 Ambulo, flumineas qua liger audit aues.  
 Aut spatijꝝ pono varias equalibus herbas,  
 Irriguæ sulcum nec dare tædet aquæ.  
 Diluit aut fesso sub amicta vitibus Ulmo  
 Ex animo curas Bacchus, ab ore sitim.  
 Paucaq; subiiciunt, illic mihi carmina Musæ,  
 Tempora dum leni sunt madefacta mero.  
 Forsan & abruptos fando renouamus amores,  
 Et quondam dulces flemus amicitias.  
 His miser atq; alijs, tento lenire dolorem,  
 Ille sed in medijs nescit abesse rosis.  
 Tunc piget, ac mallem nullos tetigisse libeons,  
 Cum subit in studijs nil opis esse meis.



*Me miserum quod non alio mihi tempore nasci  
 Contigit, aut vita non breuiore frui.  
 Nam mihi quid cœli iucundum cernere lumen  
 Prodest? si grauior proxima quæq; dies?  
 Pax ades, ô longumq; mane, pax optima rerum,  
 Pace vigent vrbes, pacis alumnus Amor.  
 Est locus vmbrosas vbi Cynthia educat Aënos,  
 Et rapido nunquam Sole tepescit humus.  
 Illic propter aquas è ramis arboris altæ  
 Suspendam rediens hanc tibi Phœbe lyram.  
 Et duo rugoso crescent in cortice versus,  
 Ut sciat hanc omnis ripa fuisse meam.  
 Pace lyram facta posuit tibi Phœbe Secundus,  
 Ille tuus Vates, muneris illa tui est.  
 Tunc deducta nouis mihi carmina fontibus ibunt,  
 Forsan & à nullo vate secundus ero.  
 Non ego deletas acies, non aspera dicam  
 Prælia, res oris non erit illa mei.  
 Rura colam, teq; alme pater, qui bella coërces,  
 Te labente die, te veniente canam.  
 Interea dum fata negant Chytræ recursum  
 Pectore vos memori semper habebo, Vale.*

*Ad Ioannem Sambucum Pannonium.*

ELEGIA III.

*Ibimus æquoreas sine te Sambuce per undas.*

*Sit*



Sit precor ad longas utilis hora vias.

Tu repetis primos Araris, quos vidimus, ortus,

Et patriæ gelido rura sub axe tue.

Noster & à Ligeris tecum procul amne recedit,

Indigus, ah, medicæ nunc Apianus opis.

Vade, nec immixti correptum febre sodalem

Desere, iucundum te duce fiet iter.

Diuidimur, sic fata iubent, valeatis amici,

Hei mihi, quòd toties hoc ego dico, Vale.

Non ego vos properans letanti mente relinquam,

Moribus hæc feritas absit abestq; meis.

Flebo ego discedens, & vos amplectar euntes,

Et querar absenti nil fore dulce mihi.

Gratus enim longæ mihi consuetudinis usus,

Quicquid in hoc nobis incidit orbe, fuit.

Scilicet in vestro geniales pectore Musæ

Effigiem moris constituere sui.

Hinc amor & simplex probitas, hinc copia fandi

Tinctaq; Cecropio carmina melle siccant.

Non pariter latum sulcabimus amplius æquor,

Prora fatigatis non dabit una thorum.

Nec simul à nautis portus scitabimus aptos

Et quæ noctis iter sydera, uela regant.

Vos quoq; suprema nunc forsitan alloquor hora,

O utinam memores sitis uterq; mei.

Ipse pruinosæ iuga seu calcabo Pyrenes,



Sine tuo lassus gurgite Vare bibam:  
 Seu quocunq; trucid caput hoc feret impetus unda:  
 Semper inoblita vos pietate colam.  
 Fœlix qui laribus contentus viuit auitis:  
 Fœlix ô nimium cui sua terra sat est.  
 Ille satur tacitis & inambitiosus in hortis  
 Degit, ubi proavis res fuit ante suis.  
 Certè ego, si sinerent mea fata, quiescere vellem,  
 Nec toties longas quolibet ire vias.  
 Certè ego sic agerem molles inglorius annos,  
 Nec mihi solstitium, nec grauis esset hyems.  
 Vtile quid iuuenes errando perdimus æuum?  
 Nemo tamen curas effugit ipse suas.  
 Adde tot exhaustos multis sine honore labores,  
 Quorum culpata est, nec meruere, fides.  
 Interea subrepat iners & inutilis ætas  
 Inq; alias tacitè mors vocat atra vias.  
 Sic vates umbris crudelibus occubat Altus:  
 Sic Rosa, flos cui nuper vterq; sui.  
 Alte tuos cineres (quicunq; est) alluit Arnus,  
 Pœoniæ celsis occidit ille iugis.  
 Nec iuuat ingenium doctas formasse per artes,  
 Fonte nec Aonio deposuisse sitim.  
 Concordes animæ, regeret dum spiritus artus,  
 Natalis cuperem vos tenuisset humus.  
 Quis dedit ignotis tumulos, quis lumina texit?



Quis scit, an hæc fati nos quoq; iura manent?  
 Quandocunq; volent, superis parere necesse est:  
 Terra sepultura quælibet apta meæ.  
 Nulla mihi est, nostro quæ ploret funere, coniux,  
 Et pia, si moriar, non erit orba parens.  
 Ad mea sed quando venietis busta sodales,  
 Qua procul occiduo littora Sole tepent:  
 Este mei longum memores, requiemq; precati,  
 Spargite pallentes ante sepulcra rosas.  
 Et facite, ut cineri Lotos mea præbeat umbram  
 Carmen & in viridi cortice tale gerat:  
 Immiti Vates consumptus morte Secundus  
 Hic situs est: dicta pace, Viator eas.

Ad Ioachimum Camerarium  
 Pabergensem.

ELEGIA III.

Si vacat arcanis aures præbere querelis.  
 Nec data per lævas omina spernis aues:  
 Accipe quæ primis Ioachime cadentibus astris,  
 Accipe quæ uidi cum fuit orta dies.  
 Nox erat, & placidos spargebant sydera somnos,  
 Quos leuis æria deuehit aura via.  
 Plaustraq; Menalia dum custos flecteret vrsæ,  
 Somnia sunt curas hæc imitata meas.  
 Flumen erat, dubito fuerit num Rhenus an Ister,  
 Spumi



Spumifer aut Albis, sed reor Albis erat,  
 Stabat arenoso vetus vrbs in margine ripæ,  
 Omne cruentato milite cincta latus.  
 Castraq; spectabat virgo de mœnibus altis.  
 Fallor, an in læuaserta fuere manu?  
 Flebat, & inuitis miscebat fletibus iram,  
 Turrigero longas vertice scissa comas.  
 Ergo fremens, quis me manet exitus, inquit? an ultra  
 Sors mea, quo tandem progrediatur, habet?  
 En ego quam foui tot lustra fideliter urbem,  
 Nobile cui de me nomen habere dedi,  
 Efferus ex imis euertere sedibus hostis  
 Nititur, & venia ius superesse negat.  
 Hic pietatis honos ea libertatis amata  
 Gratia? quid fieret si scelus orsa forem?  
 Profit & excuset, quod sum mihi conscia recti,  
 Et caput in patriæ nulla quod arma tuli.  
 Sed prodesse parum est: labes tunc prima malorum  
 Hoc miseræ (verum si profitemur) obest.  
 Mœnia debueram natalia prodere, texi:  
 Fida nec innocuis ciuibus esse, fui.  
 At decus hinc nostræ quondam meruere puellæ,  
 Ad quas & populi summa relata sui:  
 Vindicibus merces iam nulla rependitur armis,  
 Cùm tulerit aliæ præmia, plector ego.  
 Quid faciam? qua spe nitâr? quo lumina flectam?

Vnde



Vnde petam lassis anxia rebus opem?  
 Non mea connubijs operatur in vrbe iuuentus,  
 Pace bona casti gaudet Amoris opus.  
 Squalida vastatis apparent frugibus arua:  
 Hostis ab agricola non sinit arua coli.  
 Nec lego purpureos inserta recentia flores:  
 Non mihi flos pratis mollibus ullus hiat.  
 Funera bis vidi campis indigna meorum,  
 Damna bis aduerso tristia Marte tuli.  
 Hei mihi, qualis erit (quod abominor) exitus urbis,  
 Concidet hostili si reſerata manu?  
 Quis tenerum pauidæ latus hauriet ense puellæ?  
 Virginitas cuius præda latronis erit?  
 Hæc, oculi quæcunq; uident, cinis omnia fient.  
 Vtraq; dicetur flebile ripa solum.  
 Ergo dies veniet, qua mœnia nulla tuebor,  
 Paruaq; restabit nominis umbra mei.  
 Quæq; fuit murus, terram proſcindet arator,  
 Urbsq; sub his, dicet, collibus alta fuit.  
 Quid grauius victore Geta miſeranda tuliffem  
 Cesare quam magno bella gerente fero?  
 Atq; utinam ſæui potius mea viscera Thraces,  
 Persaq; & extremus dilaceraret Arabs.  
 Hoc tamen inſœlix caſus ſolares acerbos:  
 Vulnera cognatæ ſunt grauiora manus.  
 Maiorum tumulos, ſacraſq; Tuiftonis umbras

Testor,



Testor, & hoc tacito sydera fixa polo,  
 Me servasse fidem: si mentior, ultima nunquam  
 Quæ pationtantis hora sit vlla malis.

Et tamen ut furijs iusurgit atrocibus hostis?  
 Si lubet in cineres sæuiat ille meos.

Herbiferae valles, gelidiq; in vallibus amnes,  
 Quicquid & in terris dulce relinquo, Vale.

Este mei memores ripæ, Nymphæq; sorores,  
 Longa mea in vestris regna fuere locis.

Plura querebatur, nostro sed protinus omnis  
 Corpore defluxit somnus, & orta dies.

Mæstus, & obscuræ turbatus imagine noctis  
 Sub matutini lumina Solis eram.

Montis inaccessi radicibus adiacet imis.

Lucus, ubi varia consociantur aues.

Est sacer arbutis, vastisq; recessibus horror,

Per medium rauca voluitur amnis aquæ.

Hic trepidæ speciem repeteus in valle quietis

Ergo quod (aiebam) somnia pondus habent?

Cur nimium memini? verisq; simillima vidi?

Languidus Aurora cur oriente fui?

Dum queror, & varijs turbatus obambulo curis,

Mobilis arboreas impulit aura comas.

Ecce quatit rapidis Iouis armiger aëra pennis

Albus & incuruis vnguibus hæret Olor.

Nulla fuga est capto: spectantq; silentq; volucres,

Aspera



*Aspera dum fulvæ præpetis arma timent.  
 At vigil, Auroram qui cantibus evocat, ales  
 Audet, ab ærijs obuius ire iugis.  
 Tunc volucer sævas exercitus undiq; pugnæ  
 Suscitæ, alarum plausibus antra fremunt.  
 Interea remouent subeuntia nubila Solem  
 Præfagiq; micat fulminis igne polus.  
 Terreor, & vanos reor hæc quoq; fingere somnos,  
 Sed patula uigilans ilice nixus eram.  
 Mox pauca redeunt, & ouantes Sole reducto,  
 Paulatim molli pace fruuntur aues.  
 Et niue candidior, veluti iam fata vocarent,  
 Fundit Olor dulces ad vada nota sonos.  
 Protinus exclamo, superi mea visa secudent:  
 Inq; Notos, quicquid triste minantur, eat.  
 Nec minus indigenis voueo sua munera Nymphis,  
 Et palmis haustas libo duabus aquas.  
 Hæc tibi, qui causas aperis Ioachime latentes,  
 Carminibus volui non reticere meis.  
 Plura quidem vidi, sed quæ celanda putavi:  
 Valle sub arcana cætera quercus habet.*

Ad Ioannem Hagium Francum.

## ELEGIA V.

*Scribis, longa meos nunquid via temperet ignes,  
 Aut quid adhuc sæui miles Amoris agam.?*

B

Absen



Absentemq; refers consumi tabe puellam,  
 Multaq; fortunæ de leuitate queri.  
 Protinus, ut legi, calefacta per ora cucurrit,  
 Sparsit & attonitas flamma rubore genas.  
 Sunt etiam lachrymæ (nec turpe putabis) obortæ:  
 Admonitu Dominae cor mihi molle fuit.  
 Non quisquam meliore fide (tu testis) amauit,  
 Cum noua me Veneris misit in arma puer.  
 Tunc ego regnabam, nec me foelicior alter  
 Gessit militia signa Cupido tuæ.  
 Tunc primum dulcis præconia noscere famæ,  
 Et cœpi teneris velle placere modis.  
 Utq; silet maris vnda, maris cum sternitur vnda:  
 Sic ego tranquillus, sic ego letus eram.  
 Nulla mihi vasti restare pericula Ponti  
 Fingebam, nullas iam superesse vias.  
 Sic auidus prelusit Amor, mox omnia vertit,  
 Longaq; post actum ver breue, cœpit hyems.  
 Nam pudor à cupida cum cederet ore puellæ,  
 Nec caperet fastus amplius illa suos:  
 Immemor ipsa mei, quo spes minor, acrius arsi,  
 Spumens in breuibus ceu fuit æstus aquis.  
 Quis mihi non illo solatia tempore dixit?  
 Quis graue sub Brumam non miseratus iter?  
 Cum tu præcipuè de mille sodalibus Hagi  
 Fletibus ærumnas prosequerere meas.



*Præda recens (memini) licet ipse Cupidinis esses,  
 Et similis toto pallor in ore foret,  
 Vulnera lenibas tamen infœlicis amici,  
 Et mihi dicebas : i modo, sanus eris.  
 Quid tamen hybernis pulsas Aquilonibus Alpes,  
 Profuit, & rupes scandere Iura tuas?  
 Me Rhodanus velox, me clementissimus amnis  
 Ceruleo lassum gurgite vexit Arar.  
 Vidi spumiferis ubi Sequana fontibus exit,  
 Vidi qua tumidas in freta voluit aquas.  
 Est tamen indefessus Amor, nec inhospita curat  
 Saxa, nec irati murmura sæua maris.  
 Quid querar infœlix? Tua molliter ossa quiescant,  
 Alte sub Hetruscis nuper humate iugis.  
 Tu mihi per casus omnes, dum fata sinebant,  
 E cælo missus dulce leuamen eras.  
 Ergo ego te nunquam miseris deflere querelis  
 Cessabo, donec me premat atra dies.  
 Nunc simul à Domina, charisq; remotus amicis,  
 Vt vaga Nimboso turbine pinus, agor.  
 Ante meos oculos, quæcunq; reliquimus, hærent,  
 Et quæcunq; animo grata fuere meo.  
 Sic mea lux patrios me sæpe uocauit in hortos  
 Sic lachrymans flammæ est mihi fassa suas.  
 Sic gemuit, sic culta fuit, sic oscula iunxit,  
 In viridi mecum sic requieuit humo.*



Sic ego triste Vale, sic verba<sup>R</sup> ouissima dixi,  
 Vltima sic posito nox vigilata mero.  
 Hæc mihi cùm subeunt, qui penè resederat ignis  
 Crescit, & admonitu robora sumit Amor,  
 Sed tamen aut fallor, positis aut tempore curis  
 Quod mihi promisit vox tua, sanus ero.  
 Vuat, & abrupti causam sciat illa coloris,  
 Non reuocant lapsos irrita vota dies.  
 Iam nihil est totum quod amauimus, omnia mecum,  
 Dij quoniam magni sic voluere, tuli.  
 Quod superest, melius ver exigat utilis æui.  
 Vuat, & ardoris sit modus illa mei.  
 At tibi, qui mecum longo coniungeris. usu,  
 Dulcia coniugij vincula nectat Hymen.  
 Quæq; iuuentutis sunt præmia puriter actæ,  
 Ante tuos videas pignora certa pedes.  
 Me doctis animum iuuat emendare libellis,  
 Candidior forsân proximus annus erit,

Ad Montem pessulanum, cum eam urbem stu-  
 diorum gratia cum Stibaris inuiseret.

## ELEGIA VI.

Hospes in hanc venio, paucis comitantibus, urbem,  
 Este salutati Dijq; Deaq; loci.  
 Vos mihi fœcundi montes, agriq; salubres  
 Vtiliter visæ vos mihi sitis aquæ.



Si quis & hîc nouit nomen patriæq; meumq;  
Mansuetam fesso porrigat ille manum.  
Tarda quòd insolito moueo vestigia passu,  
Huc procul à Ligeris fecimus amne viam.  
Quòd niger in facie color est, Sol ora perussit:  
Quòd sedet in reliquo corpore pallor, amo.  
Cincta quòd Aonia non sunt mea tempora lauro,  
Non ego Castalio fonte poëma bibi.  
Sit mihi fas celebres ab Apolline scandere colles,  
Sit mihi fas sacro ponere monte pedem.  
O mihi qui monstret cultus habitusq; locorum,  
Atq; aliquid miri si nouus orbis habet.  
Sic ego, sic vnus, veteris non inscius æui,  
Certior hinc (nam te nouimus inquit) eris.  
Hîc tenet à Volcis nomen lacus, herbifer illîc  
Setius aërijs mons petit astra iugis.  
Hîc cœtus hominum Delphines adire solebant,  
Inter & errantes ludere sæpe rates:  
Hîc egere vagos nautis in retia pisces,  
Ad uada cùm lato profiliere mari.  
Inde petens leuam fuit hæc solidissima tellus  
Nunc sinus, hæc Marius littora fodit, ait.  
Talia, me ducens per singula, retulit vnus:  
Retulit & mores gentis, & urbis opes.  
Grande viæ pretium, nec pœnitet aëris æstus  
Nec toties mistos imbre tulisse Notos.



Ipse recedentes (quis posset credere?) Phœbus  
 Iam caput Aemonij per senis, vrget equos.  
 Arua tamen placidi fouet hîc clementia cœli,  
 Blandaq; ceu primi tempora veris eunt.  
 Gramina nec campis desunt, nec montibus vmbra,  
 Estq; ferax herbis, arboribusq; solum.  
 Hîc oleæ pingues, & amenis ficus in hortis,  
 Surgit, & Idaliæ Myrtus amata Deæ.  
 Et pretium doctis quorum meruere labores  
 Vatibus, & baccis laurus amicta suis.  
 Albaq; Morus adest, nec habet monumenta cruoris  
 Siue tui Thysbe, Pyrame siue tui,  
 Malaq; proueniunt benè olentibus aurea ramis,  
 Mala vel hybernis mensibus apta legi.  
 Quæq; maris rubri puras imitantia gemmas  
 Lucida pallenti cortice grana tegunt.  
 Nec virides desunt victorum præmia palma,  
 Nec tilia molles, Heliadumq; nemus.  
 Te tamen in primis referam dulcissima Lothos,  
 Carmina tu succis imbue nostra tuis.  
 Quàm iuuat hos circum frondoso vertice colles  
 Visere, & intacto cingere flore comam?  
 Rosmaris & spicæ passim redolentis aristæ,  
 Et Thyma Iunipero cum bicolore virent.  
 Grataq; se vertens ad euntis lumina solis.  
 Vnde sui causam nominis herba tulit.



Quæq; licet riuus gaudens aspergine nulla  
 Vda fit, aut pluuijs tacta madescit aquis.  
 Nec minus in medio quam stæchades æquore gignit,  
 Et quæ iuncosum plurima littus amant.  
 Nec ferrugineus tyrioue simillimus Ostro  
 Flos tener, Oebalio sanguine tinctus, abest.  
 Nec croceum cingens Narcissus floribus albis,  
 Atq; suo pulcher natus Adonis auo.  
 Quæq; aliæ (nec enim cunctas nunc persequar) herbæ  
 Nomina non Elegis mollibus apta gerunt.  
 Adde maris pisces, & quo vos carmine dicam  
 Aemula Gnosiaco dulcia vina mero?  
 Te quoq; Læde canam, tacitis qui leniter undis,  
 Diuidis hanc, nulla vortice tortus, humum.  
 Te Dryades Nymphæq; colunt, assuetaq; ripis  
 Multa suo fluuium gutture mulcet auis.  
 Hic igitur suaves captare iuuabit odores,  
 Purpureo violas hic ego vere legam.  
 His ego vitabo rapidos in collibus æstus,  
 Terra sua æstiuum dum sitit vsta canem.  
 Salue diues opum regio, tua solis ab ortu  
 Littus ad Hesperium gloria quærit iter.  
 Vrbs salue, cuius nomen sinus vltimus orbis  
 Audit, & exoriens occiduusq; dies.  
 Te propter tantos libuit perferre labores,  
 Tu requies curis vna futura meis.



Ad Gregorium Schetum Medicum.

ELEGIA VII.

Schete meus natalis adest : foelicibus opto  
 Auspicijs, seruent hunc mihi fata diem.  
 Hoc ego vitales hausi vagitibus auras,  
 Primaq; stirps sexu de meliore fui.  
 Nec tantum rosei pulchras in luminis oras  
 Contigit hac primum tollere luce caput:  
 Abluere antiqua mala sed contagia culpa,  
 Inq; salutiferis sumere nomen aquis.  
 Cingite Pierides viridi mea tempora Myrtho,  
 Aut maris ornatas rore ligate comas.  
 Lapsaq; sub terras (nam vos meministis) & orta  
 Tempore natalis signa referte mei.  
 Flaua pruinosas Aurora fugauerat umbras,  
 Enixa est utero cum pia mater onus.  
 Scorpius Eoo ducebat ab orbe recentes,  
 Purpureum scandens aethera, solis equos.  
 Et matutinos Cyllenius ante iugales.  
 Vrile carpebat, Pleiade natus, iter.  
 His comes e pelagi surgens natalibus undis  
 Alma capistratas Cypris agebat aues.  
 Post hanc Phyllirides iaculis armatus & arcu,  
 Et coeli Aegoceros qui iacet ante fores.  
 Et puer Iliades, & amantes flumina Pisces

E qui



E quibus hic Boreæ proximus, ille Noto.  
 Fulua sequebatur, Phryxum Phryxiq; sororem  
 Per mare quæ nitido vellere gessit ouis.  
 Torua laboriferi gradiens per cornua Tauri  
 Falcifer occiduo stabat in orbe senex.  
 Hinc cum fratre pio foelix concordia pollux  
 Ibât, ubi sedes mors habet atra suas.  
 Iupiter Herculei lustrabat terga leonis,  
 Iupiter in summo, letus honore, polo.  
 Marte premebatur, quæ noctibus efficit aquas  
 Libra dies, Paphiæ cognita Libra Dea.  
 Sic vaga per cœlum dijs astra volentibus ibant,  
 Dulcia quæ vitæ munera luce tuli.  
 Protinus infantem mansuetis Phœbus in ulmis  
 Fovit, & Aonidum, dixit, alumnus eris.  
 Frondentiq; torum cinxerunt Baccare Musæ,  
 Cederet ut cunis noxa repulsa meis.  
 Ipsa sed arcani scrutata volumina cœli  
 Vranie tales edidit ore sonos.  
 Salve parve puer, minus infœlicibus annis  
 Dignè puer nasci, non meliore diè.  
 Non tibi foelicem vitam, non fata negarent,  
 Pocula castaliæ (sydera testor) aquæ.  
 Sed malè tunc sacros tractabunt secula Vates,  
 Varibus ereptas miles habebit opes.  
 Tuq; peregrini longis in tractibus orbis.



Multa feres bellitædia, multa via.  
 Ingratosq; hominum mores, casusq; tuorum  
 Et sterilem frustra sæpe querere fidem.  
 Non tamen ambitio, nec amor te franget habendi,  
 Vna sed imponet dulce puella iugum.  
 Nec tibi difficilis Saturni stella nocebit,  
 Ipse, minax quamuis, Mars quoq; mitis erit.  
 Parce queri, vinctes: sed erit mora longa laboris:  
 Moribus & fati cætera mando tuis.  
 Hactenus, & gemit, sacrasq; Heliconis ad undas  
 Rettulit, his actis, turba nouena pedem.  
 Dicamus bona verba, Deus regit astra, feruntur  
 Illius arbitrio, sydera, terra, fretum.  
 Illum supplicibus verbis venerabor, ab illo  
 Et decus & probitas ingeniumq; venit.  
 Viuamus, dum fata sinunt, & amicus amici:  
 Quis scit an hæc vnquam sit reditura dies?  
 Ipse nouos Genius ludens ad pocula cantus  
 Audiat, & multo nox eat acta mero.  
 His Genius contentus erit, non hîc mihi frater,  
 Non soror est festas quæ paret ipsa dapes.  
 Nec genitrix nato quæ sospite munera soluat:  
 Dî faciant reditu gaudeat illa meo.  
 Da mihi vina puer lenes facientia somnos,  
 Donec in Oceanum sydera prona cadant.  
 Optime natalis salue, multosq; per annos



*Luce bona fœlix & venerandus eas.*

*Ad Deos Maris in funere Delphini.*

ELEGIA VIII.

*Dij maris, et virides, quas sunt penes æquora, Nymphæ  
Ad bibulum madidis littus adeste genus.*

*Ille decus pelagi, vestro sub numine, Delphin,  
Cæruleas subita morte reliquit aquas.*

*Et nunc (ecce) iacet refluvis inhumatus arenis,  
Vix dedit eiecto funeris Alga locum.*

*Quid benefacta iuuant? quid, non rationis egentem  
Esse? quid equoreos non violare Deos?*

*Num minus exanimem versant in littore fluctus?  
Sæuâq; turbati verberat vnda maris?*

*Non senior potuit Nereus, non optima Tethys  
Ferre nec Oceanus, quam meruisset, opem.*

*Vivat atrox Xiphias, ducitq; per æquora sulcos.  
Ille tamen curuas mergit in ima rates.*

*Viuit & Echnæis, medio quam nauita ponto  
Sæpe stupet totis classibus esse moram.*

*Occidit innocuus tumidarum rector aquarum:  
Optima cum pereant deteriora manent.*

*Non iterum vitreas exercens lucibus vndas  
Transiliet rapido carbasa tensa Noto.*

*Nec calidos vitans æstiuæ sideris ortus  
Conscia delitijs incolet antra suis.*

*Nec*



Nec dulces natos, veteresq; reuifet amores.  
 Flebile nempe iaces magne natator onus.  
 Hoc tamen infœlix mortem solabere, quod te  
 In solida positum vita reliquit humo.  
 Non tua diripient sub gurgite viscera pisces,  
 Herentem scopulis non fera tundet hyems.  
 Te quoq; credibile est ausum sperare sepulchrum,  
 Liqueris æquoreas cùm moriturus aquas.  
 Sit, quodcunq; volet: sub adesi vertice montis.  
 Hic ego te manibus contumulabo meis.  
 Prosit adhuc, vastas olim Delphina per undas  
 Lesbida cum sacro vate tulisse lyram.  
 Sæpe dabunt gemitus volucres ad busta marine,  
 Et tibi certa Tethys Nereidesq; ferent.  
 Quiq; rigat iuxta factum de cautibus antrum,  
 Grata quies vmbra fons erit iste tuæ.  
 Sæpius ingrediens antiquos nauita portus,  
 Hauriet hic dulces, te veneratus, aquas.  
 Siue tamen gelidæ mulcent te littoris auræ,  
 Atq; sub his gaudes nunc habitare iugis:  
 Seu colis Eridani ripas, sine vortice cuius  
 Lenta per Elysium uoluitur vnda nemus.  
 In gremio, Delphin, recuba telluris amata  
 Molliter, & cineres sæpe reuife tuos.

Ad



Ad Ioannem Stigelium, Poëtam.

## ELEGIA IX.

Sydera conuexo dum tu labentia cœlo  
Scribis, & in populo sacra diesq; tuo.  
Nos procul ignotis Stigeli degimus oris  
Ad maris occiduas non refluentis aquas.  
Et modò Massiliæ portus miramur, & altas  
Puppibus antiquum stœchadas hospitium.  
Phocaicosq; sinus, & qui letissima sulcat  
Arua, Pyrenæis montibus ortus, Atax.  
Quòd mihi si faciles præberet Cynthius aures,  
Ingenioq; forent mollia fata meo:  
Non ego sacrorum morem, causasq; referrem,  
Sydera nec Phœbi per duodena viam.  
Nec canerem numeris ciuilia grandibus arma:  
Omnis in imbelli Carmine nostra mora est.  
Sed varias gentes, sed nomina prisca locorum,  
Hoc aptum nostris viribus esset opus.  
Non mihi Castalias Phœbi chorus exhibet undas:  
Finge sed antiquis Vatibus esse parem.  
Scilicet in tanto miserarum turbine rerum,  
Ille sacer Vates ingeniosus ero?  
Non tamen hîc cui penitus monumenta prioris  
Transierim, ripis Garde propinqua tuis.  
Garde pater bibule stagnans sulcator arenæ,  
Qui tacitè peragis lene vadosus iter.



Illorum Deus ora mouet, terrisq; relictis  
 Per liquidum cœli nube vehuntur, iter.  
 Nos dolor instabilesq; vices, seriesq; malorum  
 Ingenium tenebris exonerare vetant:  
 Excidio egregias bis deformauimus vrbes,  
 Seruitum magnos vidimus ire Duces.  
 Exulat ignotis princeps Fridericus in oris  
 Vtilior patriæ quàm fuit ipse sibi.  
 Necdum finis adest, restant fera prœlia, restant:  
 Terra parum est, veniunt per freta mille rates.  
 Hic quoque, cui fuerat commissa potentia rerum,  
 (O pudor) externas Rhenus adorat opes.  
 Quanta secuturis tempestas imminet annis?  
 Iam mihi cum Phœbo Calliopœa, Vale.  
 Tempus in vmbrosis tu, cui licet, exige syluis,  
 Quà tibi pelignas porrigit Ilmus aquas.  
 Inceptoq; operis sacri decurre labores:  
 Non erit ingenij fama sepulta tui.  
 Me fatis (sint dura licet) parere necesse est:  
 Arbitrio quoniam non licet esse meo.

Ad Renatum Henerum Medicum.

## ELEGIA X.

Quid mihi vobiscum est, inconstans turba, puella?  
 Improbe iam fesso quid mihi fiet Amor?  
 Scilicet æternum si non ego vulnus haberem,

Impe



Imperij fierent iura minora tui?  
 Parce precor seuo liquefactis igne medullis,  
 Nuda quid immites condis in ossa faces?  
 Sic ego saepe leues infœlix alloquor auras:  
 Irrita sed nubes verba Renate ferunt.  
 Parrhasia (memini) sub sydere virginis arsi,  
 Multaq; quod vellem posse negare, tuli.  
 Forsan & hyberno cinis ater in orbe iacerem,  
 At citò sum longas iussus inire vias.  
 Littus ad hesperium veni, Dominamq; reliqui,  
 Dum feror hùc illùc tertia currit hyems.  
 Omnia, quæ possunt flammæ extinguere, feci:  
 Quæris profuerim quid mihi? peius amo.  
 Illa meis oculis, quamuis procul absit, inhaeret,  
 Nec memorem Phœbi nec sinit esse mei.  
 Iamq; sub hoc ipso terrarum fine, reperta est  
 Vna recens nobis (ecce) puella malum.  
 Hæce est, quam toties laudare soletis amici,  
 Dum niueum choreis fert tunicata pedem.  
 Nec quia formosa est capior, sed imagine tangor,  
 Nec quod amo video, cogor amare tamen.  
 Namq; (fatebor enim) gelida mea vita sub Arcto  
 Huic similes vultus, si modo viuit, habet.  
 Sic elata genis, sic est astricta papillis,  
 Sic pede, sic oculis, sic operosa comis.  
 Vtraq; blasa ferè est, annis crescentibus ambe,

Nec



Nec magis hæc longa est, nec magis illa fuit.  
 Nec pudor aut casti faciunt discrimina mores,  
 Ut credas partes unius esse duas.  
 Quid mihi nunc prodest quòd nos mare separat ingēs?  
 Mens bona quòd tantis exagitata malis?  
 Quid iuvat effigiem teneræ conflasse puella,  
 Quam manus in digito leua minore tulit?  
 Nū minus hæc præbet tellus, quòd amare necesse est?  
 Num minus hæc cogunt me simulachra mori?  
 Colle sub herboso (nil te celabimus) ibam,  
 Vnde maris virides conspiciuntur aquæ.  
 Laurus & umbrose salices & Lotos & Ulmi  
 Præcipuè Baccho Lotos amica, virent.  
 Illic, sicut erat viridantibus abdita ramis  
 In gelida violas mane legebat humo.  
 Ut vidi, obflupui penitus, nec lumina flexi,  
 Et dominam verè sum ratus esse meam.  
 Hunc etiam gestum flores carpentis habebat,  
 Sic etiam casu, candida vestis erat.  
 Non virides referunt magis vda Sisymbria Menthæ,  
 Non magis in speculo se videt vlla parem.  
 Sed tamen ignotas cur illa veniret in oras?  
 Vnde pedem ferret? quòue teneret iter?  
 Quinetiam timui, miseram si fata tulissent,  
 Mortua ne sensus luderet umbra meos.  
 Mox patuit dubiæ iucundus imaginis error,



Vocis ut arguta detulit aura sonum.  
 Fortè sedens patula sua verba canebat in vmbra:  
 Hæc mihi fecerunt auribus hausta fidem.  
 Cumq; meos horror subitò percurreret artus,  
 Frigidus in toto corpore sudor erat.  
 Ex illo flammis semper discordibus vror,  
 Excruciatq; recens & rediuiuus amor.  
 Ergo ferè portum cùm iam mea vela tenerent,  
 In scopulos facies hæc mihi fecit iter.  
 Luna quater plenis reparauit cornibus orbem,  
 Cura nec ex animo defluit illa meo.  
 Nec libet in patriam quamuis sit amata, reuerti,  
 Puppe nec in Latium per freta longa vehi.  
 Durus, & ingenij vaser experientis Vlysses,  
 Audaci has quondam remige torsit aquas.  
 Non Ithace tanti, non Neritos ardua tanti,  
 Penelope tanti sed tamen vna fuit.  
 Sit mihi spes Domine medijs vel Syrtibus, ausim  
 Vel Scyllæ scopulis applicuisse ratem.  
 Ipse traham fortes innixus in ordine remos,  
 Vincitq; nauali compede crura geram.  
 Lentus es? an sentis, nec adhuc misereris amici?  
 Et mea littoribus verba Renate cadunt?  
 Adfer opem, quoniam Medicas tibi tradidit artes  
 Phœbus, & Aonidum te chorus omnis amat.  
 Non tamen hic vllas morbus desiderat herbas,



Est opus eloquio dulcis amice tuo.  
 Nec precor ut contrà solum me diligat illa,  
 Dummodò sit penitus non aliena, sat est.  
 Ipse velim riguos tantum comes ire per hortos  
 Ludere & in viridi, si patiatur, humo.  
 Solariq; meos, quos illa resuscitat, ignes,  
 Et fessam placido saepe tenere sinu.  
 Illius & niueis componere carmen in vlnis:  
 Hic ego sum vates, hic mea Musa valet.  
 Quod si pauca mihi dederit semel oscula, iuuet  
 Dum notum terris nomen amoris erit.

Ad Erhardum Stibarum Eq. F.

## ELEGIA XI.

Sol abit è Tauro, iamq; igneus aestuat aër,  
 Ut solet æthereis dum Leo feruet equis.  
 Nam procul à gelida nos terra Lycaonis Arcto  
 Sustinet: impatiens ante caloris eram.  
 Vix sata nunc humiles æquant lactentia sulcos,  
 Qua dirimit patriæ Cynthius arua mea.  
 At seges hic passim maturis flauet aristis,  
 Vstus & ardenti sole dehiscit ager.  
 Frigida nec patulos humectant flumina campos,  
 Nec rigat effusis humidus imber aquis.  
 Finitimos Lauri montes oleæq; coronant,  
 Nulla sed è raris dicitur umbra comis.



His quoq; non ventis, non huic assueuimus aura,  
 Semper iners tepido spirat ab axe Notus.  
 Vastaq; percurrunt sine nube tonitrua celum,  
 Et rapido Titan excoquit igne fretum.  
 Hæc mihi narrabant (memini) quæ vera negabam,  
 Omnia nunc credo, post modò cautus ero.  
 Nec mihi quis toties sedem mutare, nec ultra  
 Suaserit ignotis viuere littoribus.  
 Quæq; sibi placeat regio: bis munera frugum  
 Fertilis hîc magno fœnore soluat humus.  
 Fœtibus arboreis sit nulla beatior ora,  
 Hos Pallas campos, hæc iuga Bacchus amet.  
 Ista iuuent alios, ego nostro gratulor orbi,  
 Menus ubi fluuius proluit arua suo.  
 Quæq; venit læto vestitos palmite colles  
 Separat, & curuas deuexit amne rates.  
 Menus ab Aurora per pingua culta volutus,  
 Illic temperies viribus apta meis.  
 Sol licet æstiuos propior superingerat ortus,  
 Sicca vel Erigones torreat arua Canis:  
 Frondea secreta præbent umbracula syluæ,  
 Prataq; muscosis fontibus vda sonant.  
 Parturit & flores tellus, fessisq; per herbas,  
 Lenis ad irriguas aura medetur aquas.  
 O nemus, ô valles gelidæ! quater ille beatus  
 Quem sopor argutas opprimit inter auēs.



Non illi venis ardor sitientibus hæret,  
Candida nec mutat feruidus ora calor.  
Ast ego si quando patriam, si quando reuisam,  
Fuscus & ardenti sole perustus ero.  
Atq; utinam exhaustos febris non occupet artus,  
Nec tener in flammæ corporis humor eat.  
Quàm vellem colles tacitus reptare salubres,  
Et mea sub viridi rura videre iugo.  
Errat diuitias si quis miratur inanes,  
Iugera sat culti pauca tenere soli.  
Post obitus, miseri cum lux brevis occidit æui,  
Pondera nil auri diuitis ampla iuuant.  
At si quis Musas, paruo contentus, amauit,  
Ille vel inuita morte superstes erit.  
Tu quoq; quem veterum sanguis commendat auorum,  
Despice magnificas, nos imitatus, opes.  
Et mecum vmbrosis, quoties sinit æstus, in hortis  
Incipe iam Lauri fronde ligare comam.  
Et rerum causas & finem quære bonorum,  
Pectora quæ dulci mœsta quiete leuant.  
Hæc tibi sub Myrtho residens florente canebam,  
Ut scires animi vota Stibare mei.  
Cætera cura tua est: saluum modò fata remittant,  
Lumen eris patriæ præsidiumq; tuæ.



## ELEGIARVM

Ad Carolum Clusium. A.

## ELEGIA XII.

Clusi quid viridi cingis mea tempora Lauro?  
 Non sunt ingenio mollia fata meo.  
 Tu mihi vel Myrti nectas è fronde coronam,  
 Vel caput hoc circa quælibet arbor erat.  
 Non me Pierides Clusi fecere poetam,  
 Pota nec Aoniæ lucida fontis aqua.  
 Sed dolor & lacrymæ, sæuiq; Cupidinis ignes,  
 Tristis & ad rigidas sæpè querela fores.  
 Ingenium (memini) spernebam carmen & umbram,  
 Innocuisq; diu Vatibus hostis eram:  
 Ut facerem versus dilectæ cura puellæ  
 Impulit, & studij præmia magna tuli.  
 Præmia quæ vincunt gemmas & munera Regum,  
 Quicquid & in lato nascitur Oceano.  
 Ipsa mei pretium vigilati grande laboris,  
 Lux mea populeo cinxit honore comam.  
 Nunc procul à patria miseri solatia luctus  
 Mœstâ cano solis carmina littoribus.  
 Desine velle meos Lauro redimire capillos:  
 Desine, temporibus conuenit illa tuis.  
 Ast ego, quòd teneros semper colo mitis amores,  
 Serta coronata Myrtea fronte geram.  
 Salue arbor, salue Hesperij's celeberrima sylvis,  
 Frigida quam patriæ non habet ora mea,

Atq;



Atq; utinam velles nostris quoq; crescere ripis,  
 Qua secat obliquo Cynthus amne solum.  
 Non magis optarim sacras mihi surgere Citros,  
 Grata nec arenti punica mala siti.  
 Summa petant alij: Myrtum veneramur amantes,  
 Si mereor, crines ambiat illa meos.

## In Myrtum Clusij.

Quæ Dea? nata mari, quæ defert germina? Myrtum:  
 Quis chorus hic? comites ex Helicone novem.  
 Vnde Deæ Myrtus? donavit Clusius illi.  
 Cui dabit illa? tibi. quis dare iussit? Amor.  
 Cur tamen hoc folijs, cur baccis addidit aurum?  
 Articulis Charites composuere suis.  
 Salve Myrte novis donum mihi dulce Calendis,  
 Instar Apollineæ tu mihi frondis eris.

## Ad Hagium.

## De lacrymis amantum.

Si crudelis amor lacrymis concederet Hagi,  
 Flere tuus vates nocte dieq; velim.  
 Quòd si nil prosunt, & crescit fletibus ardor,  
 Assidue madidas quid iuuat esse genas?  
 Nil certè: tamen ignis aquis, aqua temperat ignes:  
 Hinc tristis maneant fonte perenne liquor.

ELEGIARVM FINIS.



## P. LOTICHI SECVNDI

Ad Erasmum Neusteter cognomento

Stürmerum Eq. F.

SARNIS VENATOR.

Iam gelidos vocor in saltus, viridesq; sub vmbrae  
 Altorum nemorum, iuvat ire per aua Syluae  
 Ad liquidos fontes celebrataq; flumina Nymphis:  
 Et vigili patulos indagine cingere montes.  
 Tuq; adeo decus Aonidum, domitorq; ferarum,  
 Et merces iucunda mei Stürmere laboris,  
 Ingredere aspirans, mecum venabere Damas,  
 Mecum Capreolos, ramisq; sub arboris altae  
 Duces securos in molli cespite somnos.  
 Ipse etiam Cytharam Phoebus quandoq; reponit.  
 Et pharetras plectris, & mutat plectra pharetris:  
 Aestus erat mediusq; dies, & fessa per omnes  
 Captabant valles animalia frigus opacum,  
 Alituumq; genus, ripeq; amnesq; silebant:  
 Cum lycidas solis recubans Venator in antris,  
 Cormiger aëris ubi Cynthius educat Alnos,  
 Absentem flebat Sarnim, gemitusq; ciebat,  
 Ad circumstantes euoluens talia Sylvas.  
 Syluae, quae tenues ramis diffunditis vmbrae,  
 Vmbrae dulce mihi riguis solamen in herbis,  
 Et sacri fontes & amicae fontibus Aurae,

Sarnis



Sarnis ubi est? quibus infelix in montibus errat,  
Quas habitat terras Sarnis? quibus exulat oris?  
Rupibus his Corydon & Iolæ frater Amyntas,  
Phyllidis & veteres iactant Amaryllidis ignes,  
Pastores ambo: nemorum nec poenitet illas.  
Noste Chare puer Solis redeuntis ab ortu  
Solis ad occasum, medioq; vocamus in aestu,  
Nec te poeniteat nemorum: sunt humida nobis  
Antra, fatigatis puras dat Cynthia vndas,  
Cynthia umbrosis valles, & frigida Tempe.  
Omnia tecum una fugerunt gaudia nostra,  
Sarni, nec eretis sine te venabula quercu,  
Nec pharetras gestare libet; cui nostra laborent  
Retia? quis pariles ætate lauabit ad amnem  
Capreolos, texitq; novos per cornua flores?  
Fœlices olim Sylva, quas Sarnis obibat  
Sydere Luciferi primo, dum naribus acres  
Intemerata canes rostris vestigia captant.  
Gaudebant Sylva, gaudebant fronde a rura,  
Aurarumq; leues animæ, atq; in montibus umbra.  
Non illum Zephyris latuit variantibus aër,  
Non oriens Phœbus: sudî prænuncia signa,  
Quidq; vehant Hyades, quid agat Venator Orion  
Nouerat, & tacite per amica silentia noctis  
Tela gerens humeris ibat, dum frigida cœlo  
Sydera conuiuent blandos imitantia somnos:



Ah miser, ignotis nunc errabundus in oris  
 Antiquos imo suspirat pectore saltus:  
 Saltusq; fluuiosq; & nota cubilia, valles.  
 Non mihi te saltem licuit dulcissime rerum  
 Affari extremum, suprema nec oscula iunxi,  
 Nec mandata dedi, nec, Sarni reuertere, dixi,  
 Infoelix: cum tu Lycidam Nymphasq; iuberès  
 Esse tui memores, iterumq; uocares,  
 Humida declinans ad amatos lumina colles.  
 Sarni Vale celsæ responsant undiq; rupes.  
 Responsant caua saxa, Vale, Vale optime Sarni.  
 Húc puer ô formose, nouas húc explicat umbras  
 Populus, & viridi prætexit gramine ripas  
 Cynthius, & molles irritat murmure somnos:  
 Húc puer ô formose redi: non tempora vite  
 Longa meæ superant, tu nunc eris alter in istis  
 Montibus, & manuum inuenies monumēta mearum.  
 Ipse tibi sæuo tutas à frigore Myrthos,  
 Ipse serò Lauros, & dum serò, crescite dico.  
 Fœlix illa dies, qua tu mihi redditus olim.  
 Post triste exilium, post duros mille labores,  
 Narrabis casusq; tuos, & flumina & urbes,  
 Quæq; peregrinis habitent animalia Syluis.  
 In numerum quercus ipse fagiq; loquentes,  
 Ipse conualles, ipsa hæc arbusta sonabunt:  
 Dūcite,



Ducite, ut ante, canes pueri, gestate pharetras.  
 Sperabant hîc leta sibi connubia Nymphæ  
 Sarni, tua capta forma & florentibus annis:  
 Nunc spes absumpta Nymphis, nunc vallibus imis  
 Abruptos luget Dryadum chorus omnis amores.  
 Gramina sylvestres sanant Gortynia capras,  
 Quas bonus occulta Venator arundine fixit:  
 Non desiderium releuant, non gramina curas.  
 At tu non iterum nostros miraberis artus  
 Care puer, non his fuimus, dum fata tulerunt,  
 Indecores ambo syluis: tu prima voluptas  
 Tu postrema mihi, meminiq; ô Sarni tuorum  
 Lustra per hæc quondã, memini venerãde laborum.  
 Ut iaculum hoc ima semel à radice recisum  
 Quod solidum nodis olim fortissimis Hagnon  
 Quod Lycide nunc dextra gerit, non amplius ullis  
 Induet aut frondes, dabit aut venantibus umbras:  
 Sic nostro nunquam cedit de pectore Sarnis.  
 Sarnis nos dilexit, & ipse est dignus amari.  
 Sis memor ô longumq; Vale iam dura canentem  
 Fata vocant Lycidam, riguis tua dignior ætas  
 Fontibus, & syluis, & amictis gramine ripis:  
 At meus in tenues vaneſcat ſpiritus auras.  
 Hæc Lycidas, & surgit, eum comitantur euntem  
 Asterionq; Laconq; canes, & grandibus ora  
 Humeſtant ambo lachrymis: ille vndiq; ramis

Ilice



Illice decisis alta prope flumen amœnum  
 Tela sagittiferis suspendit clausa pharetris,  
 Et picturatos, quos Sarnis gesserat, arcus  
 Subligat, & iacula & pedicās & tortile cornu.  
 Addidit & titulum Lycidas: hæc Sarnidis arma.  
 Illum etiam Sylvæ, illum etiam fleuistis arena,  
 Herbifer illum etiam te nomine Sarni vocantem  
 Cynthius, & gelidis fleuit sub collibus Acis,  
 Mæsta repercussis gemit quoq; rupibus Echo.



P. LOTICHII ET ALIO-  
RVM QVORVNDAM  
CARMINA.

\*

Ad Lauros in hortis suburbanis.

*Lauri quæ rapidos arcetis vallibus æstus,  
Tuq; susurranti fons nemoralis aqua.  
Vos Lauri saluete mihi, salue optima rerum  
Auia frondosis Lympha sub arboribus.  
Hic ego dum licuit, curas lenire solebam,  
Qua strepit è gelidis vnda voluta iugis.  
Hic meus argutas cecinit Venator ad auras,  
Dum fleret mœstis Sarnidem arundinibus.  
O sopor, ô blanda volucres, ô gramen & herba  
Quàm fuit hic animo viuere dulce meo!  
Nunc me dilectis auellere cogor ab hortis,  
Nec mihi seua dabunt fata referre pedem.  
Este mei memores Lauri, vosq; antra valete,  
Et fons, & Musis Vallis amata Vale.*

Ad Renatum Henerum Medicum.

*Si mecum leniter meridiari  
Sub Myrto libet auiaq; Loto,  
Mi Renate, parum deambulatum  
Rus ad me venias, vt otiosis  
Disertos recitet puer libellos*

Bembi,



*Bembi, Flaminij, Actij, Augurelli,*  
*Vel quodcunq; bonum simillimumq; est.*  
*Nam quasdam volo colloctiones*  
*Tecum texere, donec aestuosus*  
*Frangat se calor: hinc sedens in herbis*  
*Dulci membra refrigerabis unda,*  
*Qua Citros rigat, alluitq; Lauros*  
*Nostris Lympha scaturiens in hortis.*  
*O iucunda beatitudo vitæ*  
*Libros inter & optimos amicos,*  
*Quos iungit bona comitas, & una*  
*Delectatio rebus ex eisdem:*  
*Et Musæ Veneresq; Transmarina.*  
*Gaude villula: quàm tuum libenter*  
*Inuiso nemus? ecquid æstimandum est*  
*Curis esse beatius solutis?*

*Renati Heneri ad Naxiam.*

*Dum tecum sedeo, mea vita, impensius vrit*  
*Cor mihi seuus Amor triste liquefaciens.*  
*Hinc animam in lacrymis fundo, sed tu mihi lucem*  
*Restituis dulci Naxia basiolo.*  
*Atq; iterũ ore anhelantẽ animam cum basiolo hauris,*  
*Argutisq; iterum me reuocas oculis.*  
*At cùm discedis, fugit halitus (heu) simul omnis:*  
*O ego non fœlix qui toties pereco.*

*Ad*



Ad P. Lotichium Secundum N.  
Angelemi Romani.

Lumina nunc lacrymis fundūt, dolor ignibus adstat,  
Vritur & flammis una anima & lacrymis.  
Vritur, & liquidis augetur fletibus ignis,  
Et crescunt flammis assidue lacrymae.  
Pectore nunc etiam nostri pars maxima fugit:  
At reliquum dubio statq; caditq; pede.  
Et montes meditatur, aquas & gramina campi,  
Nympharum & liquido rura resecta gradu.  
Mox montes horret, niuibusq; geluq; resectos:  
Atq; horret flatus Aeole seuē tuos.  
Quid iuuat insanos imbres, & frigora dura  
Seuaq; vesani flamina ferre Noti?  
Ipsi nunc campos Satyri liquere feroces,  
Nympharum & rapido turba fugata gelu.  
Tu solus montes, Lotichi, & flumina tranas,  
Nec solus longam pergis adire viam.  
Vos ô syluicolæ, sylvarum numina, Fauni,  
Vos comiti comites nunc præcor este meo.  
Cui memorate viæ solamina grata molesta,  
Vt nostro illius pectore flagret Amor.

Ad



Ad Martinum Stibarum,  
In Natalem Saluatoris, Lotichij.

Quote Carmine, qua lyra  
Natali procul à solo  
Rex sanctissime celitum  
Festo tempore concinam,  
Mūdi Christe Redemptor?

Ergo hunc alme puer diem  
Sic ducemus in vltimi  
Solitudine littoris?  
Quo tu natus es, induens  
Humanos Deus artus?

Quod possum tamen, & fretum  
Et sol æthera metiens  
Surgens audiet & cadens,  
Nos plausus dare, nos tuæ  
Matris dicere partum.

Martine incipe, nam Dei  
Hæc ætatula filio  
Est gratissima; flos tener,  
Flos ortus tener est, cane,  
E propagine Iessæ.

O dulcissima Veritas:  
Tu nos aspice, tu reple  
Dulci pectora gaudio,  
Et bellum, & lacrymabiles.  
Cum fame opprime morbos.



Ad Ioachimum Camerarium, Filium  
viri clarissimi Ioachimi Ca-  
merarij, Erhardi Stibari.

*Sancte puer summi dulcissima cura parentis,  
Editus in lucem qui venerandus eras.  
Cum tu iucundas vitæ egredereris in oras,  
Blanda tibi Aonides ferta tulere Deæ.  
Et sacra imposita Lauri de fronde corona,  
Ad cytharam dulces edocuere modos.  
Fœlix cui fauet ille chorus: maturior ævo  
Ille suo æternum carmine nomen habet.  
Huius ingenij volitant monumenta per orbem,  
Quæ præsens ætas posteritasq; probat.  
Secum ergò optatam cuperem consumere vitam,  
Atq; sub incultis antra tenere iugis.  
Tu liquidam resides intacti fontis ad undam,  
Mollis ubi cultum concitat aura nemo.  
Et varias rerum causas & sydera quæris,  
Quæq; sequenda homini, quæ fugienda notas.  
Interea volucres tenui te gutture mulcent,  
Et teneros sacro fundis ab ore modos.  
Hæc in te primis quæ semper vidimus annis,  
Pectoris indicium grande sagacis erat.  
Maeste animo, & celsi spatia per ardua montis,  
Nos humili satis est ducere valle moram.*



## In malum poëtam Lotichij.

*Salax poëta (penè nomen addidi)  
Nugator efferate, seculi pudor.  
Adhuc ne dentes exeris famelicos  
Et plena febris atq; pestilentie  
Vates siticulose ructas carmina?  
Me me laceffe, me pete, vt remordeam  
Casti pater diserte contubernij.  
An nomen addam? nolo ne superbias.  
Clamabo tantum (pace quod fiat tua)  
O carminum venusta liberalitas.*

## Ad Gregorium Schetum Medicum

Lotichij.

*Dum nos omnibus exules in oris  
Fidi erramus amiculi, nec vlllo  
Sub cœlo requiescimus, molesta  
(Eheu) Schete senectus appropinquat;  
Et languescit, vt icta sole Myrtus  
Blandæ flosculus elegans iuuenta.  
Viuiamus semel: otiumq; ruris  
Gustemus, patula sedens in vmbra  
Mecum tegmine sub virentis Vlmi  
Cœli carpe salubriores haustus,  
Mox armis fera bella luctuosis*



*Hinc nos Lauriferis agent ab hortis  
 Trans pigras maris ultimi paludes.  
 Istas nunc cytharâ & ioco atq; viho  
 Curas elue: sic laboriosum  
 Alterna vice temperemus ævum,  
 Dum longam properet dies quietem.*

*Inferiæ Lotichij.*

*Hæc tibi fide Mari posui monumenta Secundus*

*Extremum sanctæ pignus amicitie.*

*Quandoquidem procul à patria florentibus annis*

*Funere te seuo mersit acerba dies:*

*Ossa iacent tumulo: victuri gloria restat*

*Nominis, ad superos mens pia fecit iter.*

*Salve pars animæ nuper dulcissima nostræ,*

*Gaude & perpetuum rursus aue atq; Vale.*

*D. M.*

*D. IACOBO MARIO GERMANO PIETATIS ET INGENII LAUDIBVS INSIGNI AMICO INCOMPARABILI. P. LOTICHIVS POSS. B. M.*

*Expiravit in amicorum manibus x v. Calend.*

*Nouemb. Anno salutis c c c c c.*

*ac 11. & l. supra mille.*

*FINIS.*



*Errata sic corrigito.*

*Pagina 3. Linea 16. lege artium. 7. 10. hunc. 9. 25  
libellos. 15. 21. Cesare. 16. 18. repetens. 20. 1. novissi  
ma. ead. 19. cum. 27. equoreos. 35. 26. decidit. 89. 8  
post mari periodus ponatur. 42. ult. ipse.*

*2 1069  
32*

*33 558870*



1771

Received of the Honble the East India Company  
the sum of one hundred and fifty pounds  
for the purchase of the sum of one hundred and fifty  
pounds of the sum of one hundred and fifty pounds



















MC



